

Uzado di cocaina no ta disfruta di interaccion social

ORANJESTAD — Si nos mira sociedad aki na Aruba, uzadonan di droga, mas tanto esunnan di cocaina, tin un comportacion hopi peculiar. Mescos cu otro paisnan na mundo, tin e pensamento cu personanan cu regularmente ta uza cocaina, ta bringa pa sinti simpatia pa otro y ta menos probabel cu nan ta disfruta di interaccionnan social, compara cu esunnan cu no ta uza e droga.

Den un investigacion haci na e universidad di Zurich na Suisa, e ekipo investigado a bisa den nan resultadonan, e sugerencia di un tratamiento pa adiccion na cocaina mester inclui entrenamiento di habilidad social.

Cocaina ta un estimulante ilegal adictivo cu ta wordo extraí for di e blachinan di Erythroxylon coca — un mata di coca nativo di Sur America.

Uzadonan di e droga por experencia aumento di energia den un tempo cortico, euforia y ta papia pa loco. Pero cocaina por produci algun cuestion serio di salud,

incluyendo daño celebral y un aumento di e ritmo di curason y presion di sanger, cu por causa un atake di curason y stroke.

Estudionan haci prome tambe ta muestra cu uzadonan regular di cocaina ta demostra poco memoria, falta di concentracion y tin deficiencianan di atencion.

Pero pa e estudio aki, e ekipo tabata kier a mira si e uzo regular di cocaina tambe ta haci un impacto riba e habilidad social di un persona.

Un estudio nobo ta sugeri cu uzadonan regular di cocaina no ta mira interaccion social como uno valioso, di manera cu nan tin e tendencia di purba di evita esey. Investigadonan ta bisa cu esaki ta fomenta nan adiccionnan mas leu ainda.

E investigadonan a conduci un serie di experimento den dos grupo.

Un grupo a wordo traha di uzadonan cronico di cocaina, mientras cu e otro ta consisti riba control di salud.

For di experimentonan, e investigadonan a haya cu, com-



para cu control di salud, uzadonan di cocaina:

★ Ta haya dificil pa comprende e perspectiva mental di otro.

★ Ta demostra menos simpa-

tia emocional.

★ Ta haya dificil pa detecta emocionnan for di bosnan di otro.

★ Ta reporta menos interaccion social.

★ Ta demostra menos compromiso durante interaccionnan social.

INTERACCION SOCIAL "MENOS VALIOSO PA USADO DI COCAINA"

E investigadonan ta kere cu uzadonan regular di cocaina ta evita interaccion social pasobra nan ta percibi esaki como menos valioso, compara cu control di salud.

Un experimento cu ta midi e actividad celebral di participantenan durante un interaccion social ta revela cu uzadonan di cocaina ta muestra di ta menos activo den e parti di e cerebro cu ta hunga un parti importante den e sistema di gratificacion.

Investigadonan a nota cu actividad mas debil den e area aki di e cerebro tambe tabata liga na menos contacto social den simannan prome na e experimento.

"Uzadonan di cocaina ta

percibi intercambio social como menos positivo y valioso compara cu esunnan cu no ta uza e estimulante aki," Boris Quednow, kende ta na cabes di e division Experimental y Clinico Farmacopsicologico den e Hospital psiquiatrico di e universidad di Zurich, a splica.

E ekipo investigado a bisa cu e actividad celebral aki por yuda splica dicon asuntunan social, manera perdida di amigo, famia of trabao, hopi biaha no ta persuadi individuonan kendenan ta dependiente di cocaina pa supera e adiccion.

Adicional, nan a nota cu e factor cu uzadonan di cocaina ta percibi interaccion social ta menos gratifica, tambe por splica dicon hopi di nan ta perde apoyo di contactonan social — un evento cu por stimula mas leu nan adiccion. Basa riba nan hallazgo, e investigadonan ta sugeri cu ora di sigui un tratamiento pa adiccion di cocaina, individuonan mester wordo siña con pa tin interaccion miho cu otronan. □